

黎氏家集

九



青田山廬詩詞



光緒己丑夏
刊于日本使署

序

余昔從伯兄伯庸表兄子尹游獲交胡君子何莫君子
偲及芷升輩而余年於芷升子何為等故與兩人知尤
密芷升之為人篤實樸厚靜默不華其為學也亦然材
智不過中人而研精殫思沈博幽邃工力所至有材智
高明之士所未能躋其初切磨於音韻訓詁之學剔艱
索奧辨析毫芒以及先秦兩漢百家之書靡不窺究閒
涉韻語則伸片紙率就隨復散失輒不自顧拾中年後
人事紛沓離合悲懽之故有動於中而不能自遏者乃
稍形於詩歌雖及之憂愉沈鬱人不能堪當長哦短詠

累千百言不能畢竟之情志而芷升約之方寸期簡潔
湛深規諸法律而後已大要不離乎子偲家法一空流
俗浮漫夸肆之詞近是故其得詩最少而構思極精後
遭世變芷升宦蹟在外余亦奔走四方音問闊絕芷升
情況不可知而詩遂久不得見舊歲芷升偕哲弟善徵
歸葬子偲於青田始與芷升聚首於是不見芷升已十
有餘年矣時余僑居與芷升接舍晨夕過從談笑見芷
升恬退修潔機趣盎然於昔年為尤有得諸心問近詩
適未付行篋不獲較曩舊工力然覩其人已知其詩矣
今年冬余寓行省子何適將刊芷升詩由銅來出其藁

囑余商訂余辭不敏而子何惓惓意若不釋也者余不欲負子何意乃受而訂之於是知芷升近作一任懷抱攄寫不規守法律恬然若有獨喻而仍不越於法律者又以歎近讀芷升詩不啻舊歲之面芷升矣然竊怪與芷升離索久所為當必有富於疇昔而其存不及半豈有悅於中不耐如從前鍊想耶質之子何始知中數年藁罹於兵燹又以歎芷升坎坷之甚也雖然自古如陶謝韋孟高達夫溫飛卿李長吉輩存詩不過一二百篇流傳千有餘年較當時長篇鉅製者為尤久且著芷升詩雖燬佚能如是之精確又何患寡乎芷升其以斯言

為何如也余非知詩者盍敢言詩而子何以謂與芷升
知最深莫余若故不揣庸劣為訂詩若干首序諸簡端
以見余與芷升契合聚散之情並以報子何惓惓之意
焉同治十三年仲冬月望日介亭黎兆祺序

青田山廬詩鈔卷上

獨山 莫庭芝

正升

雜感七首寄胡子何

長新

已下甲辰

天地有培覆惟物殊裁傾不知天地心於我將何成衛
生計苦拙窮愁日煎烹眼前且莫顧遑說千秋名感彼
木槿花暮落朝還榮人生不復朝自昔同傷情

世事日來迫何乃太紛紛我心如亂絲治之還自焚便
欲覽滄海忽想梯高雲比類若有合理緒倏已分出門
靡所往入門無可欣徘徊對晨曦徙倚看夕曛

置身千仞岡託足非不高著意出塵網塵網羈轉牢蠢

蠢小兒輩瓦石橫相拋縱曰罔予損格避將毋勞天涯
遇惡風滿地生腥臊鮑肆寧故稽掩鼻誠難逃

古人亦有言夜行信不盜信狴羣吠聲莫禁相逐譟滔
滔世人論往往成顛倒豈乏是非心故見習難掉欲挽
料無計猶冀貞節操強守平生志連蹤從吾好

結交須黃金金多交乃厚結交須勢力勢弱交難久昔
我同袍人盟誓常在口時哉曾幾何畔去十八九豈獨
無過從且復暗指嗾已矣予何言慙然自歸咎

七歲去故里寄茲二十載家難忽迭來抱恨深於海歸
葬已無力戶籍遂遷改哀哀異鄉身鬱鬱死是待當年

門前客至今無一在世情槩如斯私心復何悔
胸懷滿牢騷動止成局促寥寥眼中人誰可語心曲我
有同心友遠在南泉麓卓越超塵凡見稀情轉篤秋風
圖雲道應馳千里足願君莫相忘魚書寄忠告

同邵亭五兄用窀韻送八弟

生芝

兩漢師承戒虛窀求是端從實事討宋儒講學重躬行
檢點身心非草草聖賢德蘊江海寬滿腹隨人那見了
倘令一得已千秋沒世誰甘物同槁古來赫赫諸鉅公
不朽都因努力早吾徒希古豈有他陋習先宜痛自掃
丈夫苟志拔流俗特立未顧無人曉識途直便向前行

慢使胸懷亂蓬葆人生少壯能幾何去者苦多來者少
百事咸當及時作莫似送君傷歲杪寒風颯颯吹枯槎
千里長征絕飛鳥皮肉凍皴手足繭如此浮名殊可惱
自從兩樞措郎州兄弟參商嗟各保縱有音書互往來
那辭時運同顛倒我輩生涯在天命與世甯須爭拙巧
但教異地共詒謀便可箕裘承祖考茲行稍喜得歡聚
伯季恐比從前老為言醫老在安心除却此方無可寶
我不南歸已五年溪山厯厯猶能藁後園林下歌吟處
竹木於今更應好同歸未得君獨去夢魂直共家山繞
烏呼雞肋功名誰便棄勉逐時賢步瀛島但須一柁屹

中流穩颿不愁風浪掉

既與生芝弟別復疊前韻

播水滌洄播山窵二十年來共幽討曉霜送別慘獨歸
滿腔離思寄枯草我聞古來志士不家食壯健光陰莫
虛了關河阻絕路迢遙餘生恐為傷離槁世上風波正
爾多勇進何如退身早倘教能辦買山貲虛譽浮華定
齊掃今宵知爾落何處寥寥野店雞聲曉出門那便期
有功但勿紛心逐旌葆風塵諳練誠所難念爾今猶閱
厯少光陰已是廿年過世故須令見纖杪憶昔中秋歲
戊戌弟姪偕歸若羣鳥豐毛健羽各茫茫兩親却顧喜

還惱當時我亦未有知若輩寧知慎自保年來生事苦
消磨盛氣消除壯心倒惟愁到老百無成敢隨時俗攻
佻巧愈令鬯水孤兒心撫訓哀哀泣先考苦寒憐爾獨
奔馳衣裘單薄愁坡老辛勤耐得乃吾願狂縱能懲是
爾寶思君從此不成眠夜尋蚤蟲翻床藁安得廬墓屋
三間常叙天倫敦式好麤糲黃蘗也自甘更無憂戚相
纏繞青田山水悠悠古木千章護沙島何時買此作
幽居終老一篙心不掉

過椽村呈黎伯庸

兆勳

已下乙巳

椽村竹木青龍蔥中有達人字伯庸作官累代陋官習

一笑甘為田舍翁經巢主人外兄弟古柏夾徑潛交通
時攜子弟共來往兩家情款渾融融花朝月夕未虛擲
長歌激烈生清風剛水孤兒久流寓三載青田畢樹封
得依栗里計誠遂年年省墓欣過從闖然一揖孰賓主
有酒便飲還烹菘兄酬弟及見愛友寶樹滿眼何玲瓏
人生快意須盡樂祇恐蹤跡如旋蓬我心久已厭城市
南村有願寧教空饑驅何日乃當已倘得安巢定欲東

附錄

芷升贈詩短章奉報

黎兆勳

鷗鷺不知鴻與鵠何論孔雀文章毒祇堪自飲南溪

淥君不見孔融志大終見傷龐公避俗離襄陽少年
夸毗何足計我有斗酒須君嘗

北客南來說車馬怪君老出風塵下我欲遺之茆一
把君不見南州孺子生遐荒比似袁閔才力強聲名
可假志不屈獨立江海憂茫茫

五英岡阡

朝上五英岡暮下五英岡去城六七里屈曲如堂防我
母有幽宅冤冤塞其亢結構出天造不假人力襄哀哀
辛壬間天割降未央父歿方畢殯母病復在牀殯宮要
留守歲杪淹東鄉兄弟侍湯藥惟予失親嘗疾亟我始

歸夕至晨已亡入門欲呼母却見棺在堂心知已不及
有淚空滂滂痛哉送爺時遂已訣阿娘弟妹哭告我欲
言聲不揚口口念熊兒屬纊猶未忘痛中聞此語愈使
摧肝腸終古平岡上躑躅空哀傷

聞楊子陵承德訃

往歲冬十月送君邛江去已恐一世交此別不重遇旋
聞郡城裏就醫病日痼誰知五齡兒有命復難固因之
急憂煎遂入北邙路人生在宇宙忽忽若流寓有子與
無子到死甯得顧悲哉一星孤承後比崔曙

感春寄生芝弟及大猷遠猷兩姪

當日一叢花花葉大於斗自割為兩叢小小僅如手當
日而今只此花昔何壯盛今何否靜觀物理須尋思根
定未可輕分移一朝別異費培植生意復初知幾時

桐兒既別感作

桐兒昨日別令予倍思親萬事不身受焉能見其真憶
昔將遠適慈訓朝夕陳復恐轉忘却臨路還諄諄驅馬
向前去交接多親姻追歡遣離思百誠未一遵安知父
母意日夜為酸辛當食愁不節當衣愁不溫直到身歸
還隱衷始含欣蹉跎想當初坐曠晨與昏眼前所繫念
一一堪哀呻我聞諺有之有子知親恩知恩待有子悔